



**Ika-Napulo'g Pito nga Dominggo
sa Kasarangang Panahon
Hulyo 27, 2014**

**Ma-Dominggong Tamdanang Litrhikal alang sa
Simbahan sa Kabus sa Diwa sa Bag-ong Ebanghelisasyon**

Ang Simbahan sa Kabus, pinaagi sa Gagmayng Simbahanong Katilingban, mao ang sakramento sa kaluwasan tungod kay ang iyang pagtuo ug paglaum alang sa kaluwasan mao ang usa ka timaan sa diyologo uban sa mga katawhan, mga magtotoo ug dili-magtotoo kon diin nagpuyo usab ang Espiritu Santo!

Samtang kita nag-andam alang sa pag-abot sa Santo Papa, Papa Francisco, sa Enero 2015 nga moduaw sa mga biktima sa bagyong Yolanda, atong susihon pag-ayo ug kung nganong hangtud karon, labaw na sa katunga sa usa ka tuig human ang bagyo, daghan pa gihapong mga biktima ang nagpuyo sa bakwetang balong-balong. Tan-awon nato kini diha sa diwa sa bili nga atong nahuptan: kadtong nagpuyo isip usa ka katilingban nakatukod dayon pag-usab, pinaagi sa bug-os nga pagboluntaryo ug pagpakabana alang sa usag-usa; apan kadtong nagpuyo isip nagbinagsa walay gayu'y kaugalingong kapasidad sa pagbawi. Kita mangutana usab: asa na kaha ang mga milyones nga mga donasyon gikan sa lokal, nasyonal ug internasyonal nga mga tinubdan sa donasyon ma-sapi man o ma-materyales man? Atong pamalandongan kining mga kasinatian diha sa diwa sa pagtuo. Ang PKP-II nag-ingon:

“B. Ang Tawag ni Jesus Koron.

**1.a) Ang Maalamon ug Katilingbanong
Pagtuo**

(65) Kini nga pagtuo naglangkob sa pagtoo sa iyang mga pulong, ug sa pagdawat sa iyang mga pagtulun-an, pagsalig nga diha kaniya anaa ang mga pulong sa kinabuhing dayon. (Jn 6:68). Ang Balaan nga Kasulatan ug ang buhi nga balaanong tradisyon sa Simbahan nagpasa kanato sa mga pagtulun-an ni Jesus. Ug busa, kinsa gani kadtong nagtuo kang Jesus magmaningkamot sa pag-ila ug pagdawat sa mga kamatuoran nga iyang makanunayong gitudlo pinaagi sa iyang Simbahan. Ang tinun-an kinahanglan gayud adunay maalamong pagtuo.

(66) Ang pagtuo naghiusa sa tawo uban ni Jesus. Gani halawom ug suod kaayo kining pagkasandurota nga si San Pablo nakasulat, ‘dili na ako ang nagpakabuhi kondili si Cristo dinhi kanako. Sa akong pagpuyo diha sa unod, nagpuyo ako diha sa pagtoo sa Anak sa Diyos...’ Ang magtotoo nagpuyo diha ni Jesus ug si Jesus usab diha kaniya. Tungod niini, ang tanang magtotoo nahiusa sa usag-usa diha kang Cristo. Ug ang pagtuo naghiusa dili pinaagi sa birtud sa nasiyonalidad ni sa hut-ong ekonomikanhon ni sa kinatawhan. Ang pagtuo lapas pa sa tanang mga utlanan sa pagka-Judio o Griego, sa pagka-ulipon o pagka-gawasnon, malalaki man o mababaye. Kitang tanan usa ra diha ni Kristo. Giila man gani sa pagtuo nga ang usa ka kaaway, tawo gyud nga angay duolon diha sa gugma. Kini naghugpong kanato sa pagka-katilingban. Kay ang pagtuo katilingbanon man.” ■

RITO SA PAGESUGOD

Ang Dios anaa sa iyang santos nga puloy-anan, siya mohiusa sa tanan nga nagpuyo sa iyang panimalay; siya maghatag ug gahum ug kusog ngadto sa iyang katawhan.

P: Sa ngalan sa Amahan ug sa Anak ug sa Espiritu Santo.

K: Amen.

P: Ang Ginoo maanaa kaninyo.

K: Maanaa usab kanimo.

Pasiuna ug Pag-abi-abi

P: Mga minahal kong mga igsoon: Atong saulogon karon ang atong pagtuo diha ni Kristo ug ang atong paglaum sa katapusang kaluwasan. Mag-ampo usab kita nga makapaambit sa atong maalamong pagtuo ngadto sa uban, sa mga magtotoo ug sa mga dili magtotoo, diha sa usa ka dayalogo nga abli, maalam ug mahigugmaon tungod kay ang Espiritu sa Dios anaa usab kanila, ug kitang tanan gitawag nga mamahimong hingpit nga hulagway sa mao gihapon nga Dios!

Akto sa Paghinulsol

P: Mga igsoon, ato karong angkonon ang atong mga sala aron mahimo kitang takus nga mosaulog niining misteryo sa gugma ug kalomo sa Diyos.

P: Ginoong Jesus, ikaw mao ang Dios sa gugma nga nahimong unod alang kanamo. Ginoo, kaloy-i kami.

K: Ginoo, kaloy-i kami.

P: Ginoong Jesus, pinaagi sa pagsagop gihimo mo kaming imong mga igsoon. Kristo, kaloy-i kami.

K: Ginoo, kaloy-i kami.

P: Ginoong Jesus, pinaagi sa imong Espiritu, gitawag nimo ang tanang katawhan nga makig-uban sa Amahan. Ginoo, kaloy-i kami.

K: Ginoo, kaloy-i kami.

P: Kaloy-an unta kita sa Dios nga makagagahum sa tanan ug pasayloon ang atong mga sala, dad-on unta kita

niya ngadto sa kinabuhing dayon.

K: Amen.

Himaya sa Diyos didto sa langit...

Kolekta

P: Mag-ampo kita: O Dios, tigpanalipod sa mga naglaum kanimo, kung wala ikaw walay malig-ong sukaranan, walay butang nga balaan; ihatag kanamo nga madagayaon ang imong kalooy ug itugot nga, uban kanimo isip among pangulo ug giya, makamao unta kaming mogamit sa mga maayong butang nga lumalabay sa paaging magunitan namo karon ang kadtong malungtaron kanunay. Kini among gipangayo pinaagi sa among Ginoong Jesukristo imong Anak, nga buhi ug hari uban kanimo ug sa Espiritu Santo, Dios nga usa, hangtud sa kahangturan.

K: Amen.

LITURHIYA SA PULONG

Unang Pagbasa: 1 Mga Hari 3:5, 7-12

L: Pagbasa gikan sa unang basahon sa mga Hari

(Basahon gikan sa Kasulatan)

L: Ang Pulong sa Ginoo.

K: Salamat sa Dios.

Komentaryo sa 1 Mga Hari 3:5, 7-12:

Usa kini ka bahin sa biyograpiya ni Salomon. Dinhi, siya nabantog tungod sa iyang kaalam. Timan-i nga si Salomon nangayo sa usa ka kasingkasing nga nagahukom sa mga tawo pinaagi sa pagsabut sa ilang tawhanong kahimtang ug nga nahibalo sa matarung gikan sa sayop. Kini daw kahibulongan kay ang buluhaton sa pagsabut ug sa matarung nga paghukom gihatag man ngadto sa kasingkasing. Ug mas mahinungdanon nga ang kaalam sa pagdumala sa mga

katawhan makaangkon sa usa ka moral nga panglantaw: ang husto ug ang sayop. Kining moral nga diwa sa pagdumala makab-ot pinaagi sa pag-aninaw ug pagpamalandong, pinaagi sa kaalam.

Salmo Responsoryo: Salmo 119:57, 72, 76-77, 127-128, 129-130

(Basahon gikan sa Kasulatan)

Komentaryo sa Sal 119:

Kini nga salmo hataas kaayo: 22 ka mga hut-ong sumala sa 22 nga mga titik sa alpabetong hebraiko. Ang matag hut-ong gisugdan sa titik sa alpabetong hebraiko. Ang matag bersikulo sa hut-ong gisugdan usab sa maong tugbang nga titik. Ang matag hut-ong adunay 8 ka bersikulo: 7 mao ang pinakabug-os; 7 +1 mao ang kahingpitan. Kini mao ang salmo sa kaalam nga nagapunting sa tema: ang gugma alang sa balaod, o gugma alang sa Dios sa balaod.

Ikaduhang Pagbasa: Roma 8:28-30

L: Pagbasa gikan sa sulat ni San Pablo ngadto sa mga taga-Roma

(Basahon gikan sa Kasulatan)

L: Ang Pulong sa Ginoo.

K: *Salamat sa Dios.*

Komentaryo sa Roma 8:28-30:

Usa kini ka madaugong awit alang sa gugma nga gihambin sa Amahan ug ni Jesukristo alang kanato. Ang atong gugma sa Dios mao gayud ang atong tubag sa iyang inisyatibo nga siya maoy unang nahigugma kanato. Nga siya unang nahigugma kanato nagpaila sa atong padulngan: uban kaniya. Apan ang pag-uban kaniya, aron sa pagtuman sa maong katuyoan, nagkinahanglan sa usa ka proseso: nga atimanon nato ang atong identidad ug palamboon kini nga mahasubay sa iyang hulagway, ang hulagway sa iyang Anak, nga pinaagi sa pagsagop kita namahimong iyang mga

igsoon: kay kitang tanan gimugna diha sa hulagway ug kasamahan sa Dios. Kini naghimo sa Kristohanong katilingban, nga nagpuyo niining pagtoo ug paglaum sa kahupnganan sa kaluwasan - ang Simbahan isip sakramento sa kaluwasan - mao ang puntong ilhanan alang sa tanang katawhan nga nagtinguha sa kahupnganan ug himaya isip tawo, diha sa kabalaan sa Dios. Ang Espiritu Santo nga nagpuyo sa kasingkasing sa tanan—diha sa kasingkasing sa tanang katawhan – nagbuhat niini.

Berso sa Aleluya:

L: **Aleluya, aleluya.** Bulahan ikaw, Amahan, Ginoo sa langit ug yuta; imong gipadayag sa mga timawa ang mga misteryo sa gingharian!

L: **Aleluya, aleluya.**

Ebanghelyo: Mateo 13: 44-52

P: Ang Ginoo maanaa kaninyo.

K: *Maanaa usab kanimo.*

P: Ang Santos nga Ebanghelyo sumala ni San Mateo.

K: *Himayaon ikaw, O Ginoo.*

(Basahon gikan sa Kasulatan)

P: Ang Ebanghelyo sa Ginoo.

K: *Daygon Ikaw, O Kristo.*

Komentaryo sa Mateo 13: 44-52:

Ang gingharian sa langit sama sa usa ka bahandi o alahas nga sa iyang kabililhon kaayo dili nimo kapugngan ang imong kaugalingon nga motahan sa tibook mong kinabuhi ug kaikag ngadto kaniya. Nahimo kining prayoridad sa imong kinabuhi: ikaw momata uban niini, maghunahuna ug magdamgo mahitungod niini, nahigugma niini, ug nadasig niini. Ang bili niini mao ang suma-total sa tanan mong gibatonan, ug labaw pa: kini mao ang kinatibukan nga mas labaw pa kay sa sumada sa iyang mga bahin. Kini usa ka realidad nga sa iyang pagpakahilum makabuntog ug mokaon kanimo.

Apan ang gingharian mao usab ang usa ka aktibo nga kamatuoran nga mosikop kanimo. Kini nagapangita kanimo ug sa uban pa nga sama kanimo. Kini naghimo ug usa ka kalainan tali kanimo ug sa uban, tali sa mga maayo ug sa dautan, tali sa kadtong iyang madawat ug dili madawat. Kini naggamit sa iyang awtoridad sa paghukom sa katapusan sa panahon. Andam nang migakus niini ang mga kabus ug mga timawa, tungod kay kini mao ang katumanan sa ilang labing dakong tinguha alang sa pagkaon ug kagawasan, trabaho ug hustisya, yuta ug kalingkawasan: ang kahingpitan sa kinabuhi. Apan ang mga edukado magpanuko sa ilang pagdawat sa gingharian tungod sa kalisud sa dalan padulong niini. Bisan pa niana, ang gingharian alang sa tanan, diha sa diyologo ug sa pagsalig sa usag-usa, sa mga katawhan gikan sa lain-laing mga kultura ug hut-ong nga abli sa pagkakabig, pagkausab, ug kalingkawasan!

Wali: Ang Simbahan sa Kabus, pinaagi sa Gagmayng Simbahanong Katilingban, mao ang sakramento sa kaluwasan tungod kay ang iyang pagtuo ug paglaum alang sa kaluwasan mao ang usa ka timaan sa dayalogo uban sa mga katawhan, mga magtotoo ug dili-magtotoo kon diin nagpuyo usab ang Espiritu Santo!

Sumadang Mensahe sa mga Pagbasa sa Dominggo	Ang Simbahan sa Kabus: Konkretong Hulagway sa kabus ug sa ilang kahimtang	Mga Puntos para sa Pamalandong/Panawagan/Hagit
Ang Simbahan sa Kabus, pinaagi sa Gagmayng Simbahanong Katilingban, mao ang sakramento sa kaluwasan tungod kay ang iyang pagtuo ug paglaum alang sa kaluwasan mao ang usa ka timaan sa dayalogo uban sa mga katawhan, mga magtotoo ug dili-magtotoo kon diin nagpuyo usab ang Espiritu Santo!	Sa imong nahimutangan, sa nahimutangan sa inyong GSK, may mga tawo ba nga dili mga Katoliko, nga sakop sa laing mga relihiyon ug mga simbahan o kaha nagpadayag nga wala na gayud sila'y pagtuo diha sa Dios? Unsa man ang ilang gibuhat alang sa ilang isig-katawo ug sa katilingban? Giunsa man nimo pagpakiglambigit kanila?	Ang gingharian sa Dios para sa tanan, diha sa diyologo ug sa pagsalig sa usag-usa, sa mga katawhan gikan sa lain-laing mga kultura ug mga hut-ong nga abli sa pagkakabig, pagbag-o, kausaban ug kalingkawasan, tungod kay ang Espiritu Santo nagpuyo sa kasingkasing sa tanan.

Please help us continue publishing this Missalette with your donation.

Any amount is appreciated no matter how small.

Thank you!

Account Name:

Communication Foundation for Asia
Metrobank V-Mapa, Sta. Mesa,
Manila Branch:

SA# 3306-509-480

BDO Old Sta. Mesa Road, Manila Branch:
SA# 7090-042-836

Please fax deposit slip to 713-2736

We are located at # 4427 Old Sta. Mesa St.,
Sta. Mesa, Manila

Padayag sa Pagtuo

P: Nagatoo ako...

K: ...Sa Dios ang Amahan ang makagagahum sa tanan, Magbubuhay sa langit ug yuta; nagatoo ako kang Jesukristo, ang Iyang bugtong Anak, atong Ginoo. Gipanamkon Siya sa lalang sa Espiritu Santo, (*Moyukbo ang tanan*) ug natawo gikan ni Maria nga Ulay. Nag-antos Siya sa sugo ni Poncio

Pilato, gilansang sa krus, namatay ug gilubong. Miadto Siya sa mga nangamatay. Sa ikatulong adlaw nabanhaw Siya. Misaka Siya sa langit ug nagalingkod sa too sa Dios, ang Amahan, ang makagagahum sa tanan. Mobalik Siya aron paghukom sa mga buhi ug sa mga minatay. Nagatoo usab ako sa Espiritu Santo, sa santos ug Katoliko nga Simbahan, sa pagpasaylo sa mga sala, sa pagkabanhaw sa lawas, ug sa kinabuhing walay katapusan. Amen.

Mga Katilingbanong Pag-ampo

Mga igsoon, sa maka-usa pa, malipayon ug mapaubsanon natong pangayoon sa atong Amahan ang mapadayunong pag-abli kanato alang sa mga gasa sa Espiritu nga nagpuyo sa atong mga kasingkasing ug madasig kita pinaagi sa maong Espiritu nga nagtukmod kanatong tanan sa paglihok alang sa kahingpitan sa gingharian sa Dios. Sa matag pag-ampo ang atong tubag: Ginoo, himoa kami nga imong buhing hulagway alang sa imong gingharian.

T: Ginoo, himoa kami nga imong buhing hulagway alang sa imong gingharian.

L: Mag-ampo kita alang sa Simbahan: nga isip usa ka Simbahan sa Kabus sa tibuok kalibutan, isip sakramento sa kaluwasan tungod sa iyang pagtuo diha kang Kristo ug sa paglaum sa kaluwasan, siya magpadayon unta sa pagtanyag sa iyang kaugalingon ingon nga usa ka puntong ilhanan sa diyalogo uban sa mga katawhan, mga magtutuo ug dili-magtutuo nga mga puluy-anan man usab sa Espiritu, alang sa bug-os nga katumanan sa Gingharian sa Diyos. Mag-ampo kita sa Ginoo.

T: Ginoo, himoa kami nga imong buhing hulagway alang sa imong gingharian.

L: Alang sa atong Santo Papa Francisco I, sa mga obispo, pari, diyakono,

kanilang nanagpuyo sa kinabuhing konsagrado ug sa tanang gitugyanan sa pag-amoma ug pagdumala sa Simbahan isip katawhan sa Dios: nga, dinasig sa Espiritu Santo, ipadayon unta nila ang pakiglambigit sa mga Kristiyano gikan sa nagkalain-lain nga mga denominasyon, sa mga Muslim ug sa mga lalaki ug babaye sa ubang mga tinuohan ug mga relihiyon, ug sa mga abling nagpadayag nga wala sila motuo'g diyos, ug danihon sila sa pagtinabangay alang sa usa ka matarung ug malinawon nga kalibutan. Mag-ampo kita sa Ginoo.

T: Ginoo, himoa kami nga imong buhing hulagway alang sa imong gingharian.

L: Alang sa mga pangulo sa kalibutan ug sa tanang gitugyanan sa kagamhanan ug pagdumala sa mga butang sa kalibutan: nga sila maghiusa ug palabyon nila ang ilang mga gituohan ug mga ideolohiya, mga politikanhong kalainan ug mga interes, ug molihok sila alang sa kaayohan sa tanan ug motubag sa tinuod nga mga panginahanglan sa katawhan. Mag-ampo kita sa Ginoo.

T: Ginoo, himoa kami nga imong buhing hulagway alang sa imong gingharian.

L: Alang kanatong tanan, mga lumulupyo sa kalibutan ug mga lungsoranon sa langit: nga kita magdinasigay sa usag-usa sa pagtudlo sa mga walay-alamag, pagtambag sa mga nagduhaduha, pagpahimatngon sa mga makasasala, pagdawat nga mapailubon sa sayop, tinuyong pagpasaylo sa mga kalapasan, paghupay sa gisakit ug pag-ampo alang sa mga buhi ug sa mga patay, diha sa diwa sa diyalogo, pagka-abli ug sa gugma tungod kay kita tinuod nga mga lungsoranon sa Gingharian. Mag-ampo kita sa Ginoo.

T: Ginoo, himoa kami nga imong buhing hulagway alang sa imong gingharian.

L: Alang sa mga hinigugma natong nipanaw na: nga sa kapasayloan sa ilang mga sala, sila makakaplag unta sa walay katapusang pagpahulay diha sa kasingkasing sa atong Ginoo ug Manluluwas nga si Hesukristo. Mag-ampo kita sa Ginoo.

T: Ginoo, himoa kami nga imong buhing hulagway alang sa imong gingharian.

L: Alang sa atong espesyal nga mga tinguha, diha sa kahilom sa atong kasingkasing. (*Hunong*) ...Mag-ampo kita sa Ginoo.

T: Ginoo, himoa kami nga imong buhing hulagway alang sa imong gingharian.

P: Ginoong Dios, kini mao ang mga pag-ampo nga among gihalad kanimo karon. Kami nangamuyo kanimo nga ihatag mo sila kanamo pinaagi sa paghimo kanamo nga matandog sa kaadunahan sa among pagkadaiya, sa pagkaplag sa imong dakong presensya dinhi sa matag usa kanamo ug sa matag linalang, ug sa pagpatalinghug sa imong inusang pagtawag: pag-uban kanimo diha sa himaya sa imong gingharian. Kini among gipangayo pinaagi ni Kristo among Ginoo.

T: Amen.

LITURHIYA SA EUKARISTIYA

Paghalad sa mga Gasa

P: Dayegon ikaw, Ginoong Dios sa tanang kalibutan, kay gikan sa imong kamanggihatagon nadawat namo kining among gihalad kanimo, ang pan nga abut sa yuta ug ginama sa kamot sa mga tawo. Mahimo kini nga kalan-on sa kinabuhi alang kanamo.

K: Daygon ang Dios hangtod sa kahangturan.

P: Dayegon ikaw, Ginoong Dios sa tanang kalibutan, kay gikan sa imong kamanggihatagon nadawat namo kining among gihalad kanimo, ang bino nga abut sa yuta ug ginama sa kamot sa mga tawo. Mahimo kini nga ilimnon nga espirituhanon alang kanamo.

K: Daygon ang Dios hangtod sa kahangturan.

P: Mga igsoon, pag-ampo kamo, aron ang ako ug ang inyong sakripisyo dawaton unta sa Dios nga Amahan, makagagahom sa tanan.

K: Dawaton unta sa Ginoo ang sakripisyo gikan sa imong mga kamot; alang sa pagdayeg ug paghimaya sa iyang ngalan, alang usab sa atong kapuslanan ug sa tibuok niyang santos nga Simbahan.

Pag-ampo Alang sa Mga Halad

P: Dawata, Ginoo, nangamuyo kami, kining mga halad nga among gihalad gikan sa kadagaya sa imong mga gasa, nga pinaagi sa gamhanang buhat sa imong mga grasya kining labing sagrado nga mga misteryo magpabalaan sa karon nga pamaaagi sa among kinabuhi ug sa pagtultol kanamo ngadto sa walay katapusan nga kalipay. Pinaagi ni Kristo among Ginoo.

K: Amen.

Prepasyo

P: Ang Ginoo maanaa kaninyo.

K: Maanaa usab kanimo.

P: Ibayaw ang inyong mga kasingkasing.

K: Amo nang gibayaw ngadto sa Ginoo.

P: Magpasalamat kita sa Ginoong atong Dios.

K: Angay ug matarong.

P: Angay ug matarung gayud, sibo ug makaluwas, kanunay ug sa tanang dapit nga magpasalamat kami kanimo, Ginoo, santos nga Amahan, labawng makagagahom ug walay-kinutubang Diyos.

Kay pinaagi sa Misteryo Paskuwal, natuman niya ang kahibulongang buhat, nga siya nagluwas kanato gikan sa yugo sa sala ug sa kamatayon, nagtawag kanato sa himaya isip

gitawag nga usa ka piniling kaliwat, usa ka harianong pagkapari, usa ka balaang nasod, usa ka katawhan alang sa imong pagpanag-iya, aron imantala sa tanang dapit ang imong mga gamhanang mga buhat, kay ikaw nagtawag kanamo gikan sa kangitngit nganha diha sa imong katingalahang kahayag.

Ug busa, uban sa mga Anghel ug mga Arkanghel, diha sa mga trono ug mga kagamhanan, ug sa tanan nga mga panon ug gahum sa langit, mag-awit kami sa himno sa imong himaya, sa walay katapusan kami magpasidnungog:

Santos

K: Santos, Santos, Santos nga Ginoo, Dios sa kagahaman. Puno ang langit ug yuta sa imong himaya. Osana sa kahitas-an. Dayegon ang nagaanhi sa ngalan sa Ginoo. Osana sa kahitas-an.

Pag-ampo sa Eukaristiya

(Human sa konsagrasyon, ang aklamasyon:)

P: Kini ang misteryo sa pagtoo.

K: Sa among pagkaon niining Tinapay ug pag-inom niining Kalis, gisangyaw namo ang imong Kamatayon, O Ginoo, hangtud sa imong pagbalik pag-usab.

(Sa pagtapos sa Pag-ampong Eukaristiko, ang pari moingon:)

P: Pinaagi kaniya, uban kaniya ug diha kaniya, gihatag nganha kanimo makagagahom nga Amahan, diha sa kahiusa sa Espiritu Santo ang tanang dungog ug himaya hangtod sa kahangturan.

K: Amen.

Rito sa Pangalawat

P: Karon mag-ampo kita sa Amahan, atong gamiton ang mga pulong nga gitudlo kanato sa atong Manunubos.

K: Amahan namo, nga anaa sa mga

langit, pagdayegon ang imong ngalan, umabot kanamo ang imong ginharian, matuman ang imong pagbuot dinhi sa yuta maingon sa langit. Ang kalan-on namo sa matag adlaw, ihatag kanamo karong adlaw ug pasayloa kami sa among mga sala, ingon nga nagapasaylo kami sa mga nakasala kanamo, ug ayaw itugot nga mahulog kami sa panulay hinonoa luwasa kami sa dautan.

P: Mangayo kami kanimo, Ginoo, nga imo kaming luwason sa tanang dautan. Hatagi kami sa kalinaw niining panahona, aron, tinabangan sa imong kalooy, mahalikay kami kanunay sa sala ug mahilayo sa tanang kasamok, samtang nagapaabot kami nga malaumon sa pagbalik ni JesuKristo, among manunubos.

K: Kay imo man ang gingharian/ ug ang gahom ug ang himaya/ hangtod sa kahangturan.

P: Ginoong JesuCristo, nag-ingon ka sa imong mga Apostoles, “Ang kalinaw ibilin ko kaninyo, ang akong kalinaw ihatag ko kaninyo.” Ayaw tan-awa ang among mga sala, kondili ang pagsalig sa imong Simbahan ug sibo sa imong kabubut-on hatagi kami sa imong kalinaw ug kahiusa, Ikaw nga buhi ug hari hangtod sa kahangturan.

K: Amen.

P: Ang kalinaw sa Ginoo sa kanunay maanaa kaninyo.

K: Maanaa usab kanimo.

P: Ipakita ta ang atong panaginigsoonay.

Kordero sa Dios

K: Kordero sa Dios nga nagawatang sa mga sala sa kalibutan, kaloy-i kami. Kordero sa Dios nga nagawagtang sa

*mga sala sa kalibutan, kaloy-i kami.
Kordero sa Dios nga nagawagtang
sa mga sala sa kalibutan, hatagi
kami sa kalinaw.*

Pangalawat

P: Kini mao ang Kordero sa Dios nga nagawagtang sa mga sala sa kalibutan. Bulahan ang gidapit alang sa panihapon sa Ginoo.

K: *Ginoo, dili ako angay nga mokalawat kanimo, apan ipamulong lamang ug mamaayo ako.*

Communion Antiphon:

Bulahan ang mga maloloy-on, kay sila makadawat ug kalooy. Bulahan ang mga malumo ug kasingkasing, kay sila makakita sa Dios.

Pag-ampo Human sa Pangalawat

P: Mag-ampo kita: Nakakaon na kami, O Ginoo, niining diyosnong sakramento, ang walay katapusan nga handumanan sa Pasyon sa imong Anak; ihatag, naga-ampo kami, nga kining gasa, nga siya mismo ang naghatag kanamo uban sa gugmang dili matukib, makapabaton unta kanamo sa kaluwasan. Pinaagi ni Kristo among Ginoo.

K: *Amen.*

Katapusang Panalangin:

P: Ang Ginoo maanaa kaninyo.

K: *Maanaa usab kanimo.*

P: Iduko ang atong ulo alang sa panalangin: Pun-a nga madagayaon sa langitnong grasya ang mga nagtoo kanimo, Ginoo; hinaut dayegon ka unta nila diha sa ilang mga ngabil, sa ilang mga kalag, sa ilang mga kinabuhi; ug kay tungod sa imong mga gasa kami ania buhi pa, unta ang among tibuok kinabuhi maimoha. Pinaagi ni Kristo among Ginoo.

K: *Amen.*

P: Ug ang mga panalangin sa labawng makagagahum nga Dios, ang + Amahan ug Anak ug ang Espiritu Santo, mokunsad unta diha kaninyo ug magpabilin diha kaninyo kanunay.
K: *Amen.*

Pagpanglakaw

P: Panglakat kamo ug isangyaw ang maayong balita sa Ginoo.

K: *Salamat sa Dios. ■*

U bani si Fr. Ben Alforque, MSC sa Missionaries of the Sacred Heart sa iyang **GOSPEL BREAK**, hamubo apan makalingaw nga video mahitungad sa Ebanghelyo karong Dominggo. Bisitaha ang **gospelbreak.wordpress.com**. o pinagi sa inyong smartphone o tablet i-swipe kini nga QR code.



**Ang Simbahan sa
Kabus, pinaagi sa
Gagmayng
Simbahanong
Katilingban, mao
ang sakramento
sa kaluwasan
tungod kay ang
iyang pagtuo ug
paglaum alang sa
kaluwasan mao
ang usa ka timaan
sa dayalogo uban
sa mga katawhan,
mga magtotoo ug
dili-magtotoo kon
diin nagpuyo usab
ang Espiritu Santo!**